

## **Efese ponokon 'wano kareta Uwapo torupamy**

Oruwa siriko Efese po Paulus tamamina man. Iro ke ro o'win tywotapo man mo'karon moro ponokon Tamusi amyikanamon maro. Ero kareta tymero i'wa man ipori'tomato'ko'me. One wara mo'karon Tamusi na'nanopy'san wairy 'se Tamusi wairy ekari'san iru'pyn me imero ero kareta ta. Tameronokon otykon ekarityry ta moro tywonumengary uku'pojan. Amykon terapa Tamusi na'nanopy'san apyimykon 'wano me enapa ero kareta wairy amyikaton amykon oty uku'namon.

### **Ero kareta wota'saka'san**

1:1-2 Karella a'motopo auranano

1:3 - 3:21 Kristus ta mo'karon Tamusi amyikanamon kuranondory

4:1 - 6:20 Moro asery amano emery

6:21-24 Karella y'ma'topo auranano

### *Karella a'motopo auranano*

<sup>1</sup> Paulus, mo'ko Tamusi nisanory wararo Jesus Kristus napojoma'po, ero kareta merojan mo'karon Efese\* ponokon Tamusi wyinonokon 'wa, mo'karon Kristus Jesus amyikanamon 'wa.

<sup>2</sup> Oro mo'ko kyjumykon Tamusi, mo'ko Jopoto Jesus Kristus enapa tyturu'poporykon eneposen o'waine. Oro sara'me ajysen.

\* **1:1** Amykon moro 'Efese' animero'pa tywaije mandon.   **1:1**  
Apojoma'san 18:19-21, 19:1

*Mo'karon Tamusi napo'i'san waipory*

<sup>3</sup> Tykuranondo nainen mo'ko Kyjopotorykon Jesus Kristus jumy Tamusi. Mo'ko 'wa ro irombo tykuranondo kytaton pa'poro kapu tano kurano oty ke mo'ko Kristus ta. <sup>4</sup> Mo'ko Kristus ta ro ero nono wo'kapyry uwaporor tapyije i'wa tywaije kytaton, tywyinonokon me kywaito'ko'me, ija'wany'pa tombata kywaito'ko'me enapa aipy-nano ta. <sup>5</sup> Kari'na pynary ke ty'wa penaro terapa ty'makon me kywairykon man tyje i'wa tywaije man mo'ko Jesus Kristus ta. Moro wara ro irombo oty wairy 'se tywaije man. <sup>6</sup> Iwara moro toty awongapojan mo'ko tynipynary ta ky'waine tynyry'po kurano pok.

<sup>7</sup> Mo'ko ta ro tymboka i'wa kytaton moro imynuru ke. Morokon kyja'wanykonymbo tyka i'wa man, poto me imero moro tyturu'popory wairy ke. <sup>8</sup> Tywonumengapore tywairy ta, oty ukutyry ta enapa ty'wa moro tyturu'popory poto me imero tanepo i'wa man. <sup>9</sup> Mo'ko Kristus ta moro tywonumenga'pombo kapy'mary man yry'po wara ro ty'wa, moro tynisanory pok tamorepa i'wa kytaton. <sup>10</sup> Moro inisanory me ro tywaije man moro tywonumenga'pombo kapy'mary, tywaije pa'poro oty we'i'po mero. Iwara pa'poro morokon kapu tanokon, nono tu'ponokon otykon a'nanopyry 'se tywaije man mo'ko Kristus upi'nonaka.

<sup>11</sup> Mo'ko Kristus ta enapa Tamusi pyitorykon me na'na tyje tywaije man, mo'ko Tamusi 'wa moro tywonumengary yry'po wara ro. Tynisanory wara ro irombo Tamusi pa'poro oty

ta kynemaminanon. <sup>12</sup> Iwara moro ikuranory pokon ety awongary taro na'na man mo'ko Kristus po penaro terapa o'po'tononymbo me.

<sup>13</sup> O'waine enapa moro iporono auranano, moro uta'no wyino ajunemyrykon man ekari'nen iru'pyn oka tota man. Moro amyika'po ke ro o'waine tywyinonokon me tyje mandon Tamusi 'wa. Mo'ko tykatopombo kurano a'kanano irombo tyje i'wa man o'waine. <sup>14</sup> Mo'ko a'kanano ro moro ky'waine Tamusi wyino oty apyiry man pori'tomanon. Tywyinonokon me kymbokarykon 'se tywaije man. Iwara moro ikuranory pokon ety awongary taro kytaton.

### *Paulus auranary Tamusi 'wa*

<sup>15</sup> Mo'ko Jopoto Jesus ta o'waine Tamusi amyikary, o'waine pa'poro mo'karon Tamusi wyinonokon pynary setai. Iro ke ro <sup>16</sup> o'kapyn roten Tamusi ety sawongaje apokoine. O'kapyn roten irombo kajatojaton moro Tamusi 'wa yjauranary jako. <sup>17</sup> Waturupoja mo'ko Kyjopotorykon Jesus Kristus tamusiry 'wa, mo'ko kurano jumynano 'wa, mo'ko tywonumengaporen a'kanano, mo'ko o'waine Tamusi uku'pojan inoro yto'me i'wa o'waine. <sup>18</sup> Oro moro aturu'san enuru 'wano me taweije oty nainen. Iwara muku'ta'ton oty me moro i'wa ako'mato'konymbo aimomo'topo wairy, oty me moro tywyinonokon 'wa inyry kurano waipory wairy, <sup>19</sup> oty me moro ky'wanokon me ina'kuru pa'poro oty ko'pono ipori'tory wairy enapa. Moro poto 'su ipori'tory emaminary pokon ro Tamusi amyikanamon me kytaton.

<sup>20</sup> Moro iro ro rapa pori'tonano mo'ko Kristus ta tamamina man, moro Tamusi 'wa iromby'san wyino awongary jako, moro Tamusi 'wa kapu ta tapo'tun wyino andy'mory jako enapa, <sup>21</sup> pa'poro oty undymanamon epo, pa'poro typori'tokamon epo, pa'poro pana'pyngon epo, pa'poro jopotokon epo, pa'poro tajatomy atywano epo enapa iwaito'me, erome roten kapyn, aire enapa te. <sup>22</sup> Pa'poro oty moro ipupuru upi'nonaka tyje i'wa man. Pa'poro oty epo jopoto me tyje i'wa man mo'karon tyna'nanopy'san apyimy 'wano me. <sup>23</sup> Mo'karon ina'nanopy'san apyimy undymanen me ro man. Mo'karon ina'nanopy'san apyimy a'no'kanon mo'ko pa'poro oty a'no'kanen.

## 2

### *Moro Tamusi turu'popory*

<sup>1</sup> Uwapo tyromo'se tywaije mandon morokon anikapy'san yja'wangon amaminano pokon, morokon oja'wanykonymbo pokon. <sup>2</sup> Morokon ta ro tamanje mandon ero nono emery wara, mo'ko yja'wangon pori'tonano jopotory emery wara, mo'karon typanaja'naramon kari'na ta amaminatoto a'kanano emery wara enapa. <sup>3</sup> Penaro ira'naine ky'karon enapa pa'poro tywaije kytaton. Morokon kyja'mungon nisanory wara tywaije kytaton. Moro kyja'mungon nisanory, moro yja'wangon kyturu'san nisanory enapa tyka'se ky'waine tywaije man. Kywoma'san po ro Tamusi erekuru apo'ny me tywaije kytaton,

mo'karon amykon terapa kari'na wara enapa.  
<sup>4</sup> Mo'ko poto me imero kotano enenen Tamusi 'wa te poto me typyna kytaton. <sup>5</sup> Morokon kynikapy'san yja'wanton amaminano poko tyromo'se kywairykon se'me, mo'ko Kristus maro nuro rapa tyje i'wa kytaton. Ituru'popory 'wa uta'no wyino tunenje mandon. <sup>6</sup> Kristus Jesus ta tawonga rapa imaro kytaton. Kapu ta tandy'mo kytaton imaro. <sup>7</sup> Iwara mo'ja ro moro pa'poro oty ko'pono tyturu'popory waipory enepory 'se tywaije man ky'waine moro Kristus Jesus ta iru'pa kanarykon ta.

<sup>8</sup> Moro ituru'popory 'wa irombo uta'no wyino tunenje mandon, amyikary ke o'waine. Opoine kapyn moro ajunemy'san man. Tamusi nyry te moro man. <sup>9</sup> Ajemamina'san poko kapyn tunenje mandon, awotamyikarykon pona. <sup>10</sup> Tamusi nikapy'san irombo ky'karon kytaton. Mo'ko Kristus Jesus ta tyka'se Tamusi 'wa kytaton, kynikapyrykon me tynyry'san kurangon amamiano ka'to'me ky'waine.

### *O'win mo'karon Kristus wyinonokon wairy*

<sup>11</sup> Simosu me kapyn tywoma mandon. I'koto'non me ajejatojaton mo'karon i'koto'san me okari'tonon, mo'karon ija'mungon ainanano ke ty'koto man inaron. Uku'toko <sup>12</sup> moro uwapo Kristus anukuty'non me awe'i'san. Mo'karon Israel pajanyombo wyino tyse awaito'konymbo tywaije man. Morokon Tamusi wykato'konymbo wyino tyse awaito'konymbo tywaije man. Animomokyrykon oty waty tywaije man. Itamusi'pa ero nono tu'po awaito'konymbo

tywaije man. **13** Uwapo Tamusi wyino tyse awaito'konymbo tywaije man. Erome te ko'wu mo'ko Kristus Jesus ta senge roten typo mandon mo'ko Kristus mynuru 'wa.

**14** Mo'ko ro irombo sara'me kywairykon me man. Mo'ko 'wa ro mo'ko Simosu mo'ko Simosu me e'ipyn maro o'win tyje man. Moro a'sakanamonymbo jenono taka i'wa man. Aseke tyja'mun ke **15** pa'poro morokon omenano mero'san tu'kuke'se i'wa man. Tyta mo'karon okonokon kapyry 'se tywaije man o'win asery kari'na me, sara'me yrykon ta. **16** Tamusi maro iru'pa rapa yrykon 'se tywaije man o'win ja'munano ta. Moro me ro wakapu pok'o tyromo'se man. Tyta moro ijenonorykon taike'ka i'wa man. **17** Sara'me aino ekapory ekari'se o'waine, mo'karon tyse aitononymbo 'wa, mo'karon senge roten aitononymbo 'wa enapa tywo'se man. **18** Mo'ko po ro irombo ky'karon okororo Simosu me, Simosu me e'i'non me, o'win a'kanano ta kytorykon taro kytaton mo'ko jumynano 'wa.

**19** Iwara te tysenokon me noro e'i'pa mandon. Tysenokon me noro emamy'pa mandon. Mo'karon Tamusi wyinonokon maro te o'win mandon. Mo'karon Tamusi auty tanokon maro o'win mandon. **20** Mo'karon apojoma'san nikapy'po apo'nano tu'po, mo'karon Tamusi auran uku'ponamon nikapy'po apo'nano tu'po enapa tamy amyjaron mandon. Moro auto pori'tomanen topu me te mo'ko Kristus Jesus

man. <sup>21</sup> Mo'ko po ro pa'poro moro auto iru'pyn me kynotamyjan, amy Tamusi waitopo me iwaito'me mo'ko Jopoto ta. <sup>22</sup> Mo'ko ta ro amy-jaron enapa matamypojaton mo'karon Simosu maro, amy Tamusi emandopo me awaito'ko'me a'kanano ta.

### 3

#### *Mo'karon Simosu me e'i'non ra'na Paulus emaminary*

<sup>1</sup> Iro ke ro awu Paulus, mo'ko Kristus Jesus poko aru'ka'po, ajupu'san me, mo'karon Simosu me e'i'non upu'san me ... <sup>2</sup> Aneta'pa 'kare maisen one wara y'wa Tamusi 'wa ty-turu'popory yry'po o'wanokon me yjemamini-nato'me. <sup>3</sup> Tamusi irombo yjamorepan moro un-emy'po uku'to'me y'wa, moro eromembo rotent ynimero'po wara ro. <sup>4</sup> Iro erupary jako o'waine, one wara mo'ko Kristus poko ywotamorepa'po ukutyry taro maita'ton. <sup>5</sup> Ero uwapo moro un-emy'po anuku'po'pa Tamusi tywaije man kari'na 'wa. Erome te mo'ko ta'kary 'wa tuku'po i'wa man mo'karon tywyinonokon tynapojoja'san 'wa, mo'karon tauran uku'ponamon 'wa enapa. <sup>6</sup> Iwara mo'karon Simosu maro mo'karon Simosu me e'i'non asewara moro Tamusi nyry kurano eponamon me mandon mo'ko Kristus Jesus ta. Simosu maro o'win ja'munano me mandon. Imaroine enapa moro Tamusi wykatopombo apyinamon me mandon. Morokon wara kyn-yjaton moro iru'pyn oka. <sup>7</sup> Moro oka pyitory me

ro moro Tamusi turu'popory 'wa tyje wa moro ipori'tory emamina'po wara ro.

<sup>8</sup> Inorombo ro ko'warono awu wa Tamusi amyikary ta. Ise'me Tamusi 'wa tyturu'popory tyje man y'wa, mo'karon Simosu me e'i'non 'wa moro atukutypyn Kristus waipory ekapory ekari'to'me. <sup>9</sup> Samorepaton morokon penaro terapa mo'ko pa'poro oty ka'nenymbō Tamusi ta unemy'san otykon wo'kapyry man pokō. <sup>10</sup> Iwara erome mo'karon Tamusi na'nanopy'san apyimy moro Tamusi wonumengapory ekarory taro man mo'karon nono epo aitonon typori'tokamon jopoto 'wa. <sup>11</sup> Moro wara oty wo'kapyry man penaro terapa Tamusi 'wa tyje tywaije man. Moro oty ro ko'wu mo'ko Kyjotyporykon Kristus Jesus ta tyka'se i'wa man. <sup>12</sup> Mo'ko 'wa ro, moro amyikary 'wa enapa enari'ma tyje kytaton Tamusi 'wa kytoto'ko'me amyikary ta. <sup>13</sup> Iro ke ro waturupoja o'waine, moro ajupu'san me ykota'mary waito'me ajamboty'paine. Awotamyikarykon te man ipoko.

### *Mo'ko Kristus pyny*

<sup>14</sup> Iro ke ro wokunamaje mo'ko jumynano, <sup>15</sup> mo'ko ety ta pa'poro kapu tanokon, nono tu'ponokon jumynano man inoro 'wa. <sup>16</sup> Waturupoja i'wa moro ikuranory waipory wara ro aturu'san pori'tomato'me mo'ko a'kary 'wa. <sup>17</sup> Iwara moro o'waine Tamusi amyikary ke moro aturu'san Kristus emandopo me kynaitan. Waturupoja aipynano ta tymita, tywotapo'nyndo enapa awaito'ko'me. <sup>18</sup> Iwara pa'poro iwyinonokon maro one wara moro

Kristus pyny akumbiry, imosin, inu'sen, ijansikyry wairy ukutyry taro maita'ton. <sup>19</sup> Pa'poro oty ukutyry ko'po moro Kristus pyny wairy muku'ta'ton. Iwara moro Tamusi kuranory imero aja'no'kata'ton.

<sup>20</sup> Moro kytaine amaminatoto pori'tonano ke pa'poro kywturupoto'kon ko'po, pa'poro ky-wonumengato'kon ko'po enapa oty kapyry taro man Tamusi. <sup>21</sup> Mo'ko 'wa ro kurano aino nainen mo'karon tyna'nanopy'san apyimy ta, mo'ko Kristus Jesus ta enapa mo'ja ro, i'matypyn me imero. Iwara ro nainen.

## 4

### *O'win mo'karon Tamusi wyinonokon wairy*

<sup>1</sup> Awu mo'ko Jopoto upu'po me aru'ka'po me kurujaton imero ajemando'ko'me moro ako'mato'konymbo wykary wara ro. <sup>2</sup> Kytaiton 'ne. Pyi'me'ke aitoko. Aturu'san apytoko. Asato'ke kytaiton. Ase'wa te aipynatoko. <sup>3</sup> O'mikatoko mo'ko a'kanano nyry o'win aino kura'mary pokon moro sara'me ase'wa aje-mamyrykon ke.

<sup>4</sup> O'win ja'munano man. O'win a'kanano man. O'win enapa irombo moro ako'mato'konymbo aimomo'topo man. <sup>5</sup> O'win Jopoto man. O'win Tamusi amyikary man. O'win asetykano man. <sup>6</sup> O'win Tamusi man. O'win pa'poro kari'na jumy man. Mo'ko ro pa'poro kari'na epo man. Pa'poro kari'na ta kynemaminanon. Pa'poro kari'na ta man. <sup>7</sup> Pa'poro ky'waine te typo typo pai moro

tyturu'popory tyje man mo'ko Kristus 'wa, moro tynisanory wara ro. <sup>8</sup> Moro Tamusi karetary irombo kynganon:

Tyjenono'namon warinu pokonokon apo'i'san maro kawonaka tyto man. Mo'karon kari'na 'wa tymykon tyje i'wa man.

<sup>9</sup> Moro 'kawonaka tyto man', o'to tauro'po ko moro nan? 'Po'ponaka tyto man' tauro'po kapyn 'kare moro nan. Ero nono tu'ponaka tywo'se man, wykaje irombo. <sup>10</sup> Mo'ko po'ponaka ito'po ro rapa mo'ko pa'poro kapu eponaka ito'po me man, pa'poro oty a'no'kato'me ty'wa.

<sup>11</sup> Mo'ko 'wa ro enapa amykonymbo tyje mandon apojoma'san me, amykonymbo Tamusi auram uku'ponamon me, amykonymbo moro iru'pyn oka ekari'namon me, amykonymbo Tamusi na'nanopy'san enenamon me, emepanamon me enapa. <sup>12</sup> Iwara taike'se terapa mo'karon Tamusi wycinonokon yry 'se tywaije man apatongan me iwaito'ko'me, moro Kristus ja'mun amyto'me enapa. <sup>13</sup> Iwara o'win kywairykon man moro Tamusi amyikary ta, mo'ko Tamusi ymuru ukutyry ta enapa. Tywaike ro kywairykon man, tywaike ro imero mo'ko Kristus wairy wara enapa. <sup>14</sup> Pitanikon wara kapyn noro kywairykon man. Parana narorykon me kapyn kywairykon man. Tameronokon omepano japepeitory 'wa kywotaropopotyrykon kapyn man. Yja'wangon amepanamon 'wa kywomu'maporykon kapyn man. <sup>15</sup> Moro iporono auranano apyinamon me te aipynano

ta kywetuwaro'marykon man Kristus 'wano me. Mo'ko ro moro ja'munano undymanen me man. <sup>16</sup> Mo'ko ro pa'poro moro ja'munano apyijan, o'win iwaito'me. Moro ja'munano wota'saka'san apyipojan asepoko. Ipori'torykon taro ro kynemaminano'pojaton ase'wa, moro ja'munano puwato'me. Iwara aipynano ta pa'poro moro ja'munano pori'tomary man.

### *Moro asery amano*

<sup>17</sup> Mo'ko Jopoto ta iro ke ero samyikapoja o'waine: mo'karon Tamusi anukuty'non emamyry wara kapyn noro ajemamyrykon man. Aronge roten mo'karon wonumengary man. <sup>18</sup> Tawa'rumanje moro iwonumengarykon man. Moro Tamusi nyry amano wyino tyse tywaije mandon. Oty anukuty'pa irombo mandon. Tyturu'poja'nare mandon. <sup>19</sup> Ija'nata'ma'san me yja'wangon omenano pokon tywaije mandon, nurijangon otykon pokon tywaito'ko'me enumene tywairykon ta.

<sup>20</sup> Amyjaron te amy me terapa mandon. Mo'ko Kristus tuku'se o'waine man. <sup>21</sup> Ekary ro tota o'waine man. Ipoko tamepa mandon. Mo'ko Jesus ta moro iporono auranano wairy tuku'se o'waine man. <sup>22</sup> Moro penatombo ajemerykonymbo emary o'waine man. Moro ro ajuta'kapojaton moro ajemu'manamon ja'munano nisanory 'wa. <sup>23</sup> Aserynon me awairykon man mo'ko ajenumengapponamon a'kanano ta. <sup>24</sup> Aserynon me awairykon man. Moro ro Tamusi wara ajypojaton. Tamambore

ajypojaton. Tamusi wyinonokon me imero ajypojaton.

<sup>25</sup> Iro ke ro moro onapi emary o'waine man. Ase'wa moro iporono auranano ekarityry o'waine man. O'win ja'munano wota'saka'san me irombo pa'poro kytaton. <sup>26</sup> Awore'korykon jako, yja'wan oty kysika'ton. Weju wo'myry uwaporoo iru'pa rapa ase'wa awairykon man. <sup>27</sup> Oma kysyton mo'ko ewa'rumpy tamuru 'wa. <sup>28</sup> Mo'ko manaman monatary kapyn noro man. Iru'pyn amaminano kapyry pok'o 'ne ka'tu rapa te no'mikan aseke tainary ke. Iwara amy omi tano 'wa oty yry taro kynaitan. <sup>29</sup> Yja'wan auranano wepa'kary kapyn man ondarykon wyino. Amy aja'sakarykon pori'tomanen iru'pyn auranano a'ta te ajekosaine, ipa'katoko oje iru'pa ipa'kary waitopo po. Iwara Tamusi turu'popory epota'ton mo'karon epanamatonon. <sup>30</sup> Kata'mato mo'ko Tamusi a'kary kysypoton. Mo'ko ro uta'nō wyino o'katonon man me ajypojaton. <sup>31</sup> Pa'poro tyjenonoke aino, pa'poro tare'ke aino, pa'poro tokone aino, pa'poro tyko'ke aino, pa'poro toruke aino, pa'poro yja'wan me aino enapa, nomiman awyinoine. <sup>32</sup> Tawa'pore te ase'wa aitoko. Akotanorykon enetoko ase'wa. Yja'wan me awe'i'san ikatoko ase'wa. Tamusi 'wa enapa irombo mo'ko Kristus ta moro yja'wan me awe'i'san tyka man.

## 5

*Aturuto'kon*

<sup>1</sup> Tamusi wairy wara aitoko typynamon pitanikon me. <sup>2</sup> Aipynano ta ajemandoko, mo'ko Kristus 'wa kypyna'san wara enapa. Mo'ko ro kupu'san me tywotyje man amy typopore Tamusi 'wa tymy me, tywomy me enapa.

<sup>3</sup> Tamusi wyinonokon me awairykon ke, wararo woryijan, wokyryjan maro aino, ukuty'non roten nurijangon otykon pok aino, kumi'me aino enapa ejato'pa pairo nainen ara'naine. <sup>4</sup> Pyiwano me ajauranaton. Oty anukuty'pa ajauranaton. Serepe me ajauranaton. Moro wara auranano aipo'pa man. Tamusi ety te awongatoko. <sup>5</sup> Ero ukutryr o'waine man: Moro Kristus nundymary taka, moro Tamusi nundymary taka ito'pa kynaitan amy wararo woryi, wokyry maro aitoto, amy nurija me aitoto pai, amy kumi'man pai. Mo'ko kumi'man irombo, ikapy'po tamusi amyikanen mo'ko man.

<sup>6</sup> Amy pairo ajemu'ma'paine nainen yja'wangonymbo auranano ke. Morokon ro irombo Tamusi erekuru ene'san mo'karon typanaja'naramon kari'na tu'ponaka.

<sup>7</sup> Asa'sakame imaroine kytaiton. <sup>8</sup> Uwapo irombo amyjaron tawa'rume tywaije mandon. Erome te taweije mandon mo'ko Jopoto ta. Aweinano tanokon me ajemandoko. <sup>9</sup> Moro taweije aino irombo pa'poro iru'pa aino, tamambore aino, iporo aino ene'san. <sup>10</sup> Oty wairy Tamusi apokupe upitoko. <sup>11</sup> Mo'karon aronge roten aitonon amaminano ka'namon tawa'rumangon

kari'na a'sakarykon me kytaiton. One wara 'ne iwairykon te enepotoko. <sup>12</sup> Morokon one'pa inikapyrykon otykon ejatory pairo irombo pyiwano me imero man. <sup>13</sup> Moro aweinano te one wara 'ne pa'poro morokon otykon wairy enepojan. <sup>14</sup> Pa'poro atuku'toto oty irombo aweinano me man. Iro ke ro moro taurotopo man:

Ajupakako, o'ny'toto. Mo'karon iromby'san wyino ajawongo. Irombo mo'ko Kristus ajaweipatan.

<sup>15</sup> Tuwaro aitoko one wara 'ne ajemamyrykon pok'o. Oty anukuty'non wara ajemandon. Oty uku'namon wara te ajemandoko. <sup>16</sup> Pa'poro aneporykon iru'pyn oma taka i'tandoko. Moro eromeno amano irombo yja'wan me man. <sup>17</sup> Iro ke ro oty anukuty'pa kytaiton. Mo'ko Jopoto nisanory ukutyry pok'o e'kutoko. <sup>18</sup> Kytetyndon. Moro tanymy irombo o'mere'kato man. Mo'ko Tamusi a'kary te o'namorosen. <sup>19</sup> Ase'wa orupatoko Tamusi warery ke, Tamusi ety awongamanon ware ke, a'kanano wyinonokon ware ke enapa. Aturu'san maro kitara pok'o awaretatoko mo'ko Jopoto 'wa. <sup>20</sup> O'kapyn roten pa'poro oty pok'o mo'ko jumynano Tamusi ety awongatoko mo'ko Kyjopotorykon Jesus Kristus ety ta.

### *Ase'wa aino*

<sup>21</sup> Aja'sakarykon pyitorykon me aitoko mo'ko Kristus nendory ta.

**22** Woryijan, oinonon apyitoko ajopotorykon me, mo'ko Jopoto apyiry wara enapa o'waine ajopotorykon me. **23** Mo'ko wokyry irombo mo'ko typyty undymanen me man, mo'ko Kristus 'wa mo'karon Tamusi na'nanopy'san apyimy undymary wara enapa. Mo'ko Kristus irombo mo'karon tyja'mun me tynapyiry Tamusi na'nanopy'san apyimy unenjan. **24** Mo'karon Tamusi na'nanopy'san apyimy jopotory me mo'ko Kristus wairy wara enapa mo'karon woryijan jopotory me mo'karon inonon wairy man, pa'poro oty ta.

**25** Wokyryjan, apytykon ipynatoko, mo'ko Kristus 'wa mo'karon Tamusi na'nanopy'san apyimy pynary wara enapa. Upu'san me ro tywotyje man romo'no tak. **26** Moro wara tywaije man Tamusi wyinonokon me yto'ko'me. Ikorokarykon 'se tywaije man moro kari'na etykatopo tuna ke, moro iru'pyn oka ke enapa. **27** Mo'karon Tamusi na'nanopy'san apyimy yry 'se tokosa tywaije man kurano me, iweriki'pa, ikiririky'pa, ija'wany'pa pairo imero. Yja'wangon otykon poko emendo'pa iwairykon 'se tywaije man Tamusi wyinonokon me. **28** Moro wara enapa mo'karon wokyryjan 'wa typytykon pynary man aseke tyja'mungon pynary wara ty'waine. Mo'ko typyty pynanen aseke kynaipy-nanon.

**29** Amy pairo kari'na aseke tyja'mun anijenonopy'pa man. Iru'pa te kynenejan. Kynewa'manon. Iwara enapa Kristus mo'karon

Tamusi na'nanopy'san apyimy pok'o man.  
<sup>30</sup> Moro ija'mun wota'saka'san me irombo  
 kytaton. <sup>31</sup> Iro ke ro amy wokyry tyjumy, tysano  
 notan. Typyty maro kynotapyitan. Irombo  
 mo'karon okonokon kari'na o'win ja'munano  
 kynaita'ton. <sup>32</sup> Amy poto 'su atamorepatopo  
 moro man. Moro wairy ro te suku'sa Kristus  
 pok'o, mo'karon Tamusi na'nanopy'san pok'o  
 enapa oty uku'ponen me. <sup>33</sup> O'waine enapa te  
 awe'i'san me ro mo'karon apytykon pynary man  
 aseke awaipynarykon wara enapa. Mo'ko woryi  
 'wa mo'ko tyino nendory man.

## 6

### *Ipanaja'na'pa aino*

<sup>1</sup> Pitanikon, mo'ko ajumykon, asanokon 'wa  
 epanamatoko mo'ko Jopoto ta. Moro wara  
 irombo awairykon man. <sup>2</sup> "Mo'ko ajumy, asano  
 ety awongako." Moro Tamusi wykatopombo  
 ro koromono me moro o'waine amy oty epory  
 man ekari'san. Ero ekari'san irombo: <sup>3</sup> "Iwara  
 ro iru'pa maitake. Akore'pe ero nono tu'po  
 ajemandake."

<sup>4</sup> Jumynanokon, sanonanokon, typo  
 roten mo'karon o'makon kysere'kopoton.  
 Ituwaro'matoko te mo'ko Jopoto nisanory  
 omepano ta, o'mano ta enapa.

<sup>5</sup> Taporemynamon pyitonano, mo'karon ero  
 nono tu'ponokon ajaporenjan 'wa epanamatoko  
 inendorykon ta, awetytykarykon ta enapa amy

iru'pyn turu'ponano maro, mo'ko Kristus 'wa awepanamarykon manombo wara. <sup>6</sup> Mo'karon ajopotorykon enuru me roten awa'poroto ky-taiton. Mo'ko Kristus pyitorykon me te moro Tamusi nisanory ika'toko pa'poro aturu'san maro. <sup>7</sup> Tawa'pore ajemaminatoko mo'ko Jopoto 'wa, kari'na 'wa kapyn te, ajemaminarykon manombo wara. <sup>8</sup> Muku'saton irombo pa'poro iru'pyn amaminano ka'nenymbo 'wa mo'ko Jopoto wyino tapety apyiry man, taporemynen pyitonano me ta'ta, aporemy'ma pai ta'ta enapa.

<sup>9</sup> Amyjaron jopotokon, moro wara enapa mo'karon apyitorykon pokon aitoko. Moro ity'karykonymbo inondatoko. Muku'saton irombo mo'ko ijopotorykon wairy ajopotorykon me enapa kapu ta. Tamusi embata irombo pa'poro kari'na asewara mandon.

### *Morokon Tamusi nyry o'wo'mato'kon*

<sup>10</sup> Wykaje ko'wu o'waine: epana'tomatoko mo'ko Jopoto ta, moro poto 'su ipori'tory ta. <sup>11</sup> Mo'ko Tamusi nyry o'wo'mato'kon e'mo'toko. Iwara mo'ko awetoine o'toto ewa'rummy tamuru 'wa omimapo'pa awairykon taro maita'ton. <sup>12</sup> Kari'na maro kapyn irombo kywo'wo'marykon man, mo'karon ewa'rummy tanokon jopoto maro te, mo'karon ewa'rummy tanokon pori'tonano maro, mo'karon ewa'rummy tanokon ero nono undymanamon maro, mo'karon kapu tanokon yja'wangon akywano maro. <sup>13</sup> Iro ke ro mo'ko

Tamusi nyry o'wo'mato'kon apyitoko, awosai-jomarykon taro awaito'ko'me mo'ko yja'wan wo'topo kurita. Iwara pa'poro oty y'mondo'po mero pyre noro maita'ton. <sup>14</sup> Oku'mytoko iro ke moro iporono auranano ke. Moro tamambore aino ytoko moro siparari kapy'po o'po'paitykon me. <sup>15</sup> Moro sara'me aino ynen iru'pyn oka aripapyry 'se aino ytoko moro as-apatorykon me. <sup>16</sup> Moro Tamusi amyikary arotoko ajainaine aja'kototykon me. Moro ke ro pa'poro mo'ko yja'wan nemokyry tyka'muramon pyrywa me'wu'kata'ton. <sup>17</sup> Moro ajaijomato'kon e'mo'toko siparari kapy'po aju'jondykon me. Mo'ko Tamusi a'kary nyry Tamusi auran apyitoko asupararykon me.

<sup>18</sup> Tamusi 'wa enapa o'kapyn ajauranatoko mo'ko a'kary ta. E'pimatoko i'wa. Moro 'wano me ro tuwaro aitoko. Tamusi 'wa ajauranarykon pokon eja'nakatoko. Ajauranatoko i'wa pa'poro mo'karon Tamusi wyinonokon pokon. <sup>19</sup> Ypoko enapa ajauranatoko Tamusi 'wa, yjauranary jako yjaurambato'me i'wa, moro atamorepatopo iru'pyn oka ekaroto'me y'wa enari'ma. <sup>20</sup> Aru'ka'po me ywairy se'me irombo moro iru'pyn oka upu'po me apojoma'po me wa. Ypoko ajauranatoko Tamusi 'wa, enari'ma moro oka ekaroto'me y'wa mo'ko Tamusi nisanory wara ro.

### *Kareta y'ma'topo auranano*

<sup>21</sup> Moro one wara ywairy uku'to'me o'waine enapa, Tikikus, mo'ko typynen ka'sakarykon,

mo'ko Jopoto ta amy tamyikaporen pyitonano  
me man inoro pa'poro oty ekari'tan o'waine.  
**22** Mo'ko ro semo'sa o'waine moro one wara  
na'na wairy ekari'to'me i'wa o'waine, moro  
aturu'san pori'tomato'me enapa i'wa.

**23** Oro mo'ko jumynano Tamusi, mo'ko Jopoto  
Jesus Kristus enapa sara'me aino, aipynano,  
Tamusi amyikary ysen mo'karon Tamusi wyi-  
nonokon 'wa. **24** Kurano nainen pa'poro  
mo'karon aikepy'pa roten mo'ko Kyjopotorykon  
Jesus Kristus pynanamon maro.

**Asery Tamusi karetary  
New Testament in Carib (NS:car:Carib)**

copyright © 2010 Wycliffe Bible Translators, Inc.

Language: Carib

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 21 Feb 2024 from source  
files dated 29 Jan 2022

9d22e71c-0a69-5934-a8d6-b98c106e8efa